
LA FRANCE

mourante,

DIALOGUE.

Le Chancelier de l'Hospital.

Le Capitaine Bayard, dit le
Cheualier sans reproche.

La France malade.

L'H. **Q**V'AS-TU Bayard, a dodeliner
ainsi la teste tout pensif : Il sem-
ble a veoir ta contenance melancolique,
que tu aye quelque fascheux chagrin : car
les hommes genereux comme toy ne s'es-
meuent iamais pour choses de peu d'im-
portance.

B. Tu as mis le doigt sur la playe l'Hos-
pital, iet'aduouë que ie suis tout desplai-
sant pour les mauuaises nouuelles que i'ay
receu ce matin sur le Pont de Paue, re-

A

255 1622

recbq

tournant de la Chartreuse de dire vn De-
 profundis pour l'ame de l'Admiral de Bo-
 niuet.

L'H. Que peut-il estre suruenu, chera-
 my, est-ce chose qui se puisse sçauoir, & de
 laquelle ie sois capable pour te consoler.

B. Tant s'en faut que tu me puisse sou-
 lager, quand tu le sçauras, qu'au contrai-
 re i'auray possible besoin de te consoler
 toy-mesme : car ie sçay que cela t'affligera
 autant & plus, que si on t'auoit osté les
 Seaux pour felonnie commise, ou autres
 mauuais comportemens, toy qui as touf-
 iours tenu la balance de Iustice en egalité,
 & avec des mains qui ont esté aussi peu sub-
 iettes aux rapines qu'aux gouttes.

L'H. Ne parlons point de cela Bayard,
 quand nous faisons bien, nous ne faisons
 que nostre deuoir. Mais venons au but.
 Qu'elles nouuelles as-tu receu : Est ce la
 mort de Luyne, ou la disgrace inopinée
 du Côte de Schomberg qui te tourmente.

B. Resue-tu l'Hospital, ie ne connus onc-
 ques ces gens-là, vrayement c'est bien au-
 tre chose qui me donne dans l'esprit. L'a-
 mour de ma Patrie me tenaille, ceste pau-
 ure France pour laquelle tu sçais combien
 toy & moy auons trauaillé pour la sauuer

des griffes de ses ennemis. Que n'auons-nous point fait pour cela ; & cependant on m'a assuré aujour d'huy qu'elle est comme aux abbois de la mort, seiche attenuée & pleine d'vlcères, qui ne voit plus, qui ne sent plus, & le pis de tout cela, abandonnée des siens propres, qui au lieu de la secourir s'amulent comme les Moynes à piller les biens de leur Abbé mourant, au lieu de pèser aux remedes neecessaires pour la conseruation de sa vie, ou le salut de son ame. Qui a veu ce houruary, veoit la France en l'estat qu'elle est aujour d'huy : De sorte que les gens de bien ne peuuent penser a elle sans souspirer & regretter sa miserable fortune, qui l'a reduite à se voir déchirée par les mains propres de ceux quelle nourrit, & si ie tel o'sois dire, par ceux mesmes qui sont destinez pour son secours.

L'H. Que tu me recite vn discours déplorable, Bayard, tu auois raison de me dire que tes nouuelles me seroient dures à supporter, l'amour qui est deu à la patrie est si redre que quiconque n'est touché de ses afflictions est desnaturé & impie. Pour moy, ie louë Dieu de ce qu'il m'a fait naistre François, & de qu'il m'a donné vn

si ardent zele pour la France, que tout ainsi
 que i'ay tousiours employé les forces de
 mon esprit pour la servir durant ma vie, il
 n'y a encore chose que ie ne face pour la
 secourir en sa necessité : & ne doute pas
 que tu ne me secôdes en vn si bon œuure.
 Qu'es-tu d'auis que nous fassions?

B. Mon opinion seroit que nous l'allas-
 sions veoir promptement, afin d'apprendre
 d'elle le suiet de ses maux, & l'estat de sa
 maladie, tu luy offriras l'experience de tes
 salutaires conseils, & moy le bon-heur de
 mon espee.

Ie ne fais point de doute qu'elle ne soit
 tres-ayse de nous reuoir encore vne fois,
 nostre presence la consolera, & sa veue
 nous encouragera dauantage à la releuer
 de sa chente. Allons, la bonne Dame n'est
 pas loin d'icy, nous l'atraperons aisement
 comme disent les Espagnols: car la pau-
 urette est si foible qu'elle ne peut plus al-
 ler gueres loin, Elle ne va pas si viste à
 l'esteuf que ces desnaturez François, qui
 sous ombre de la soustenir sous les bras
 pendant sa foiblesse, ne font conscience
 de la laisser cheoir à tous bouts de champ,
 iusques à luy faire monstrier les par-
 ties honteuses, dont ils se moquent

par apres, menassans mesme ceux qui reprouuent telles actions lasches & meschâtes. Ainsi nos renegats font veoir clairement par lettres patentes les pieces iustificatiues de l'infidelité de Lydie, ainsi que parloit iadis le grand Pontife Musca en les opuscles les deuotions grotelque.

L'H. Que meracontes-tu genereux Cavalier. Est-il possible que la France engendre & nourrisse des esprits si alienez de ce qu'ils doiuent à leur patrie, que d'arracher les entrailles de leur bonne mere qui les a si tendrement esleuez.

B. Helas ! cela est si commun auourd'huy dans le Royaume, qu'il ne s'y en remarque plus guere d'autre. Je crains mesme qu'on ne nous y regarde de trauers quand on sçaura que nous sommes bons patriottes : car il faut que tu sçache qu'on tient auourd'huy pour François sans estre impossible d'estre bon François sans estre entaché d'heresie, non plus que bon Catholique à la mode, sans estre Espagnol, qui est vne tresdangereuse incompatibilité pour le bien de ceste Monarchie. Et cependant la pluspart du Clergé, de la Noblesse, & du tiers Estat sont infectez de

ces apotrifes maximes. Ce qui faict qu'on ne s'estonne plus si la France la bonne Dame est si mal seruié, & si il y a tant de gens qui tournent le dos à la propité, à l'honneur, à la fidelité, & à l'affection naturelle à laquelle ils sont obligez envers le Roy & la patrie. Et voila pourquoy il ne se remarque quasi plus aujourdhuy aucune vestige de ceste vieille generosité Gauloise, tant tout y est abastardy. Que si i'estois d'un naturel timide, i'apprehendrois mesme de me rencontrer parmy vne nation si perfide.

L'H. Allons, Allons, Bayard, il faudroit bien de telles canailles pour nous faire peur, la vertu & la prud'hommie est un fort rampart contre la vie des meschans. Ceux qui ont commis des actions reprochables, ont tousiours honte de se trouver en face deuant les gens de bien. Tu verras que la pluspart d'eux n'oseront paroistre deuant nous, & où il se rencontrera quelqu'un qui voulust faire le suffisant, assure toy que ie le galopperay rudement, portast-il le chapeau de saint Jacques.

B. Tu sçais l'Hospital, que les dangers ne me firent iamais blefmir, & encores

moins tourner le dos. Allons à la bonne heure, i'ay cest aduantage que les traïstres me redoutent, là où i'en rencontreray, ie te promets que ie leur lauieray la teste cōme il faut, Conscience nette parle hardiment. Il me souuient encore de ce que ie dis au Duc Charles de Bourbon lors qu'il me trouua couuert de playes, prest à rendre l'esprit, adossé contre vn chesne apres la desroute de Pauic. Que ie te plains, me dit-il, pauure Bayard : Surquoy ie luy repartis. Ne me plaignez pas, Monsieur, car ie meurs glorieusement : Mais c'est vous qui estes à plaindre d'auoir combattu contre vostre Roy, & poursuivy la ruyne de vostre patrie. Si i'ay osé parler de la sorte à vn Prince victorieux, & qui auoit encores le coustel en la main. Ne doute pas l'Hospital, que ie faigne de parler genereusement contre ces insolents fauorits sortis de la poussiere, & effrontez larronneaux, qui partagent impudemment les finances de leur Maistre. Tu verras, comme ie te seconderay. Mais tous deuissant nous approchons insensiblement de la France. Ne ressens-tu pas desia le doux air du pays qui te rafraichit & recree.

L'H. Quy vraiment, mais auant que

de nous aduancer dauantage , resoudons
auparauant entre nous par quel costé
nous l'aborderons , d'autant que cela me
semble de consideration , fera-ce par la
Guyenne.

B. Non , car on soupçonneroit que
nous viendrions d'Espagne.

L'H. Qu'importe , possible que cela se-
roit cause, que nous serions mieux receus.

B. C'est tout vn , il ne faut point soubs
l'amorce d'une petite vtilité faire quel-
que chose contre la cōscience & l'honne-
tété. Pour mon regard, i'ay tousiours tenu
ceste Maxime , de ne donner iamais sou-
pçon de moy, ny d'auoir accointance
auec les ennemis de ma patrie. Et outre
cela quel plaisir aurions-nous de passer
par la Gascogne, seroit-ce pour y conside-
rer les faicts bourrus des trois Luynes, qui
ont rendu ceste Prouince si desolee que le
peuple en pleurera les ruyhes d'icy à trête
ans, la terre y estant encore toute teinte du
sang de tant de genereuse Gobleſſe qui y a
esté si miserablement & si mal à propos as-
sommée par ceste detestable guerre ciuile,
qui a produict tant de maux , par le peu
d'ordre qu'on y auoit estably, que Dieu a
permis que tous les principaux fauteurs
d'icelle

d'icelle soient morts à present, ou disgraciez : pour moy ie ne suis pas d'aduis que nous tenions ce chemin là , d'autant que ie ne sçaurois prendre plaisir à passer deuant mes yeux les folies des François, qui se sont laissez beffler par les supposts des Castillans. qui ont fomenté nos castilles, afin de faciliter les proieets de leurs conquestes dans l'Italie & Allemagne.

L'H. Prenons donc nostre route par la Picardie, ce n'est pas loin de Paris, le Duc Chaume mettra le feu dedans sa paille pour nous bien festoyer : car il est deuenu courtois depuis la cheute de son aîné.

B. Non , i'aurois mal au cœur en voyant les frontieres de ceste Prouince si deslabrees, que le seul aspect d'icelles faict iuger à tout le monde combien nostre Roy est mal seruy au regard du Roy d'Espagne, lequel n'a vne seule bicoque de ce costé-là , qui ne rie à la veüe par le bel aspect de ses fortifications , la où les nostres pleurent tant elles sont desolees. C'est pourquoy ie me contente de sçauoir le mauuais mesnage qui se faict en ces quartiers-là , sans l'aller veoir : Et puis veux-tu que ie te die l'Hospital, c'est quasi ma croyance qu'on laisse ruyner toutes les

fortifications, afin que l'ennemy s'en em-
parât quelque iour se rende par ce moyen
maistre de Paris avec plus de facilité,

*Quand on laisse vne porte ouuerte,
On veut bien qu'on entre dedans.*

L'H. Hé bien, prenons donc le chemin
de Prouence, c'est vn territoire plain de
delices, en passant nous y pourrons con-
templer les magnificences des superbes
Chasteaux de Cadnet & de Brantche, par
dessus lesquels les lieures sautent tous les
iours, ainsi que l'a curieusement remar-
qué le Marechal de Bassompierre, au der-
nier voyage que sa Majesté a faict en ce
pays.

B. Je suis content, Allons, nous pour-
rons apprendre à Mornac la genealogie
spirituelle du Cōnestable à la morte espee,
& sçaurons passans par Orenge, combien
de temps Cadnet y a exercé la fonction
d'Aduocat, & si il auoit aussi bonne gra-
ce avec le bonnet carré, comme à por-
ter l'aigrette. Mais laissons ce discours,
voila France la bonne Dame deuant nos
yeux, enuironnee d'un grand nombre de
Medecins à la mode, qui font contenance

de suer sang & eau pour l'assister, il ya mesme des Cōfesseurs. Helas qu'elle est changée depuis que nous ne l'auons veüe, le cœur me seigne quand ie la contemple en si piteux estat. Neantmoins si ne la faut il pas abandonner. Allons, approchons-nous d'elle, & luy rendons les deuoirs à quoy nature & nostre qualité nous oblige.

FR. Quelle voix entens-ie, il semble qu'elle soit touchée de mes calamitez, Hé Dieu ! est-il possible qu'il se trouue encore en ce siecle corrompu des personnes qui ayent compassion de mes angoisses, voire qui seulement se souuiennent de moy.

L'H. Madame, Dieu soit avec vous, vos frequents sanglots & vos plaintes ameres, nous font cognoistre l'estat pitoyable de vostre condition, & la iuste apprehension que vous aués du mauuais succez de vostre fortune. Consolez-vous, & vous resouueñez qu'il y a encor des bons François dans le Royaume, & bien que le nombre en soit petit, si est-il suffisant de vaincre celui des meschans, quoy qu'innombrable; esuertuez-vous seulement, & monstrez par vn courage inuincible que vous scauez aussi bien vous garentir des traistres,

que de vos ennemis ouuerts : car de cela seul depend aujourd'huy vostre salut. Pour nostre particulier nous sommes venus vous offrir nos vies, nos biens & nostre fidelité. Descouurez nous franchement ce que vous auez sur le cœur, montrez nous les playes que vous auez receu de la main propre de ceux en la garde desquels vous vous estiez confiee ; declarez nous le sujet de la maladie qui vous a alitée, & croyez que ne les sçauriez raconter à personnes qui vous soyent plus affidees, aussi la resolution que nous auôs prise de vous venir saluer n'est à autre dessein que pour vous consoler & vous secourir en tout ce que vous nous commanderez, & que vous iugerez necessaire pour vostre conseruation.

F. L'Ange de Dieu soit vostre guide mes amis, si vostre cœur correspond à vos paroles, ie ne sçauois assez vous remercier. Vous m'excusez bien, si d'abord ie vous vse de tels propos, ce n'est pas que i'aye aucun soupçon de vous; mais i'ay esté tant de fois trompee par des Architofels pipeurs, lesquels sous l'apparence d'une faulce preud'homme ne me parloient que de la restauration de mes affaires : & ce-

pendant i'ay esprouué à mon tres-grand
dommage qu'ils n'ont pensé qu'à faire les
leurs , ayans abandonné , voire miserable-
ment ruiné les miennes. C'est pourquoy
mes amis , ne trouuez pas estrange si ie
vous entretiens de cela en passant , & si en
suiuite ie vous demande franchement qui
vous estes.

B. Nous sommes deux vieux Gaulois
& de vos plus affidez sujets. Vos interets,
nô les nostres , nous ont amené vers vous.
Au rebouts de ceux qui estoient tantost
allentour de vous , & qui se sont esuadez
à la file depuis nostre arriuee , nostre seule
presence leuf ayant faict honte comme
nous croyons. Que si il estoit besoin de
vous donner caution de nostre probité, le
Connestable Desdignieres , le Marechal
de Sourré, du Halier , les Presidens Iean-
nin, le Iay, Bellieure, Gayant , Seruin , &
autres bons François , respondront touf-
jours pour nous. Outre! , Madame, que
nous ne croyons pas que vous ayez enco-
re mis en oubly ny les seruices signalez
que nous vous auons rendu , ny le nom
que nous portons, qui a eu autrefois quel-
que esclat dans le Royaume , & parmy les
ennemis mesme de cet Estat.

F. Je croy ce que vous dites mes enfans, & ne doute pas que ne soyez des personnes de grand merite : mais le long-temps & les mauvaises affaires qui me sont suruenues, m'ont rendu la memoire si confuse, & l'esprit si usé, que ie ne sçay le plus souvent ce que ie fay, non plus que le Roy d'Angleterre ; l'affliction m'accablant de telle sorte que ie perds quasi toute cognoissance, horsmis celle de mes miseres. C'est pourquoy ie vous prie m'aider à vous remettre, me disant franchement vos noms.

B. Celuy que vous voyez aupres de moy, Madame, s'appelle l'Hospital iadis vostre Chancelier, qui durant sa vie vous a aussi dignement seruy, que la pluspart de ceux qui luy ont succédé par apres ont fait le mal en ceste charge, au dettirement de vos affaires, & du public, excepté Bellicure que ie reuere pour auoir acquis peu de bien & beaucoup d'honneur. Pour moy ie m'appelle Bayard.

F. Bayard, vnique Bayard, que vous me resiouyssez. Approchez tous deux mes bons amis que ie vous embrasse mille & mille fois, soyez les bien venus, Ames rares & diuines, hélas qu'il y a long-temps

que ie vous cognois, que nous auons sou-
uent parlé de vous durant les longues ca-
lamitez que i'ay souffert depuis soixante
ans, & que ie vous ay souhaité.

L'H. Nous voicy à vos pieds, Madame,
pour vous obeir, commandez-nous &
regardez à quoy il vous plaist nous em-
ployer pour vostre seruice, nous ne som-
mes pas des Fauoris alterez, escumeurs
d'Espagne, & voleurs d'hoirie, nous ne
cerchons autre gloire que d'accomplir ce
à quoy vn bon subiet est obligé enuers
son Prince & sa patrie, autre ambition ne
nous resueille le desir d'acquérir richesses,
offices & Estats, par pratiques honteuses,
caballes, griuelees, monopoles, n'agira ia-
mais nostre esprit, nous laissons ces den-
rees corrompues à des Clercs, à des Du-
rets, & autres de telle farine, qui sont ac-
coustumez à en faire traffiq. Tout nostre
but n'estant, pour nostre regard, que de
faire veoir qu'il y a peu de Bayards, & que
parmy tant d'Hospitaux qui se bastissent
en France, on n'y sçauroit aujourd'huy
trouuer vn seul Hospital.

F. Chers amis vous auez raison, aussi
fais-ie plus d'estime de vous deux, que de
tous ces replastreux, vendeurs de theria-

que, charlatans, lâches François, pipeurs,
 & ames venales, qui sont allentour de
 moy pour me deceuoir, trahir & liurer, si
 ils peuuent à beaux deniers contens entre
 les mains de mes ennemis. Voila les qua-
 litez plus belles que i'ay remarquees en la
 plus part de tous ceux qui se sont meslez
 de me conseiller, ou de s'entremettre en la
 conduite de mes affaires. C'est pourquoy
 vous ne deuez vous estonner si vous me
 trouuez en l'estat que ie suis, vieille, cadu-
 que, attenuée, plaine d'ulceres, pauvre:
 bref vne carcasse qui n'a plus que les os, &
 qui n'attend que l'heure de rendre les der-
 niers abbois de la vie. Et vn mot:

Ceste France si florissante

Qui fut iadis l'honneur des siens,

N'est plus qu'une ame languissante,

Sans beauté, sans honneur, sans biens.

L'H. Debonnaire Princeſſe, il faut ad-
 uouer ſans hypocrisie que voſtre condi-
 tion eſt en tous biais déplorable; Nous
 oſerions quaſi dire que celle du Prince Pa-
 latin ne l'eſt pas d'auantage: mais afin de
 nous rendre capable d'apporter le reme-
 de à vos maux, nous vous ſupplirions
 volontiers, ſi noſtre propoſition vous ag-
 gregoit, qu'il vous pleuſt nous raconter de
 ſil en

fil en eguille les principaux poincts d'où
procede l'origine de tant de miseres qui
vous ont reduites dans les extremes an-
goisses , où nous vous voyons mainte-
nant.

FR. Vous sçavez , mes enfans , qu'il
faut que tout finisse , les Monarchies,
Royaumes & Republicques n'ont qu'un
temps aussi bien que le regne des Fau-
rits. Pour moy ie suis vieille , & sçay que
ie dure trop au gré de ceux qui atten-
dent ma despoüille , sous des contenan-
ces toutes plaines de charité zelée. Sça-
chez que ma fin est si ardamment desirée
que l'on ne perd vne seule heure de
temps pour trouver l'occasion de m'y
faire paruenir. Deux especes de gens tra-
uaillent accortement à cela , sçauoir mes
voisins ennemis , comme principaux res-
sorts de la machine , & les renegatz Fran-
çois teincts en graine de cochenille d'Es-
pagne, vraye engeance de viperes , qui ne
peuent enfanter leurs desseins perni-
cieux que dans les entrailles de leur mere,
telle canaille m'ayant rongé iour & nuict
les parties plus nobles de mon corps ; De
maniere que depuis soixanteans , ie peux
dire n'auoir respiré vne bonne heure de

parfaicte santé. Vous sçavez si ie me plains à tort , pour en auoir veu vous-mesmes de vostre temps les premiers auantjeu des fureurs de leur continuelle tragedie , ayans aydé à les repousser , & estans morts en peine pour me garentir : mais tout ce qui s'est passé de vostre siecle n'a esté que roses flestries , au prix des piquantes elpines qu'ilz m'ont fiché dans le cœur avec le venin mortifere de leur deuotieuse Ligue , laquelle ils ont introduite par l'enuoy qu'ils firent en France du Pere Bernardino Castorio , qui fut auteur de ces belles processions blanches par toutes les Prouinces dece Royaume , sous le precieux pretexte d'appaiser l'ire de Dieu , & de conseruer la Religion , tant ces bonnes gens ont eu soin du salut des ames des pauvres idiotz & abusez François , lesquels ilz ont faict depuis assommer à milliers dans les calamiteuses combustions de nos guerres ciuiles : & si Dieu ne m'eust suscité vn Henry III. qui m'a deliuré des griffes de ces vautours par sa vigilance , prudence , generosité , & bonne fortune ; assurement deslors c'estoit faict de moy , il chassa l'Espagnol hors de Paris : mais comme on disoit

d'Annibal , il sceut heureusement vaincre, & non bien vser de la victoire : car au lieu d'estouffer tout à faiçt ce Monstre de Ligue , il en tollera les supposts en plusieurs endroits de son Royaume , mesme s'est seruy de la pluspart d'eux ; de façon que dès l'heure qu'ils l'ont veu mort, ilz ont aussi tost remué ces vieilles cendres pour me les ietter aux yeux , & en suite ont si bien renoüé leur caballe qu'ils se sont accorremment glissez dans le Louure, & tant tournoyé par leurs pieuses brigues, qu'ilz ont renuersez tout ce que le Roy deffunct auoit fait pour restabliir les desordres passez.

Et puis pour m'acheuer de peindre il est suruenü des sangsuës de Fauoritz, pestes de l'Estat, qui ont insolemment abusé des bonnes graces de leurs Maistres, espuisé ses finances, violenté les Parlemens, bouleuersé les loix fondamentales de la Monarchie, abandonné routes les vieilles alliances de la Couronne, introduit banque d'intelligence avec les ennemis d'icelle , surchargé le peuple d'un nombre infiny d'Edicts, & suscité à plaisir des guerres ciuiles dans le Royaume , afin de profiter seuls des ruynes du public

Bref qui ont tout mis sens dessus dessous, sans que mes suffisans Conseillers, Notez cecy, s'y soient opposez en façon quelconque, se contentans de consentir accortement à la Prosopopee, en partageant le butin avec les Pirates. De manière qu'ils m'ont reduits à l'extremité où ie suis, laquelle est si grande comme vous voyez, que ie ne croy pas en pouvoit releuer ny trouver remedes à ma guerison, si ce n'est par vn coup extraordinaire de la main de Dieu, & par les efficacieuses prieres des Saints Espagnols nouvellement Canonisez, ausquels j'ay grande deuotion, excepté en saint Ignace qui s'est laissé cheoir des Cieux comme les mauvais Anges, en la representation qui fut faicte au College des Iesuites de Rome de sa Canonisation deuant Monsieur le Prince, qui est vn notable miracle.

L'H. Madame, le recit de vostre indisposition nous faict cognoistre combien vostre mal est inueteré, Au reste que vostre maladie ne soit grande, vostre corps attenué le demonstre, que les remedes à cela ne soient tres-difficiles, les plus experts ne le peuuent desnier, attendu les

redoublez' symptomes, & les mauuaises
crises qui vous sont suruenues: outre les
impertinens Me decins qui vous ont pen-
sé, & les dangereux remedes qu'ils vous
ont donné. Pour moy si i'estois creu ie
cōdamnerois tous ces Empyriques bour-
reaux à passer par les mains des bour-
reaux: Mais quoy,

Iustice est sans misericorde,

A l'endroit d'un petit larron:

Mais au gros elle faiet pardon,

Quand il sçait rachepter sa corde.

Voila pourquoy ilz n'ont point craint
de rendre vos maux incurables, afin d'om-
plir largement leurs bourses durant le
cours d'une longue maladie. Mais encore
de quels remedes plus familiers vous ont-
ilz faiet vser pour vostre guarison?

F. Ilz m'ont ordonné force partialitez
dans le Louure, quantité de petites cōsul-
tations secrettes, l'esloignement des bons
François hors du Conseil, la vente à l'en-
can des Gouuernemens, confusion de pen-
sions, force Edicts nouveaux, le restablis-
sement de la Paulette, la licence de mal
faire, point de recompense aux bons, nulle
recherche des maluersations, traffiq ou-
uert avec l'ennemy, nul soin de nos Alliez,

guerres Ciuiles , pretextes de Religion, paix fourrees , pauureté , desordre. Et de toutes ces drogues destrempees dans force Catholicon subtil , ils m'ont fait vne infinité de cataplasmes , qui ne m'ont seruy qu'à me debilitier les nerfs , & qu'à m'alterer de plus en plus la santé , ma croyance estant maintenāt que Tabarin , quoy qu'estranger , m'eust sollicité plus fidelement, voire plus sagement qu'eux.

L'H. A la verité tous ces medicamens là ne valent rien , ils sont trop violens & corrosifs , i'eusse voulu vser du Mitridat de Dom Nicolas Plastreux Marchand de Ponthoise , i'ay ouy dire qu'il guerissoit de tous maux , pourueu qu'on eust meslé parmy tant soit peu de vermillon d'Espagne.

F. I'ay eu ceste croyance au commencement comme vous , la persuation qu'on m'auoit donnee que ie me trouuerois tresbien de ses drogues : mais l'vsage m'a appris à mes despens que c'estoit vn tresdangereux medicament , qui m'a donné tant , & tant de conuulsions que ie n'en puis reuenir à moy.

B. Contre ce mal i'eusse voulu appliquer pour antidotte les boutades du President Ieannin.

F. Vous dictes vray, ie l'eusse desiré aussi bien que vous: car il y en a quelquefois de tres-bonnes: Mais qucy mes Medecins Empyriques ne les ont pas approuuees, dont le bon homme en a esté assez fâché.

L'H. Au deffaut de cela i'eusse donc pris tous les iours en me couchât vne cuilleree de cyrop de sagacité du feu Garde des Sceaux du Vair; i'ay entendu dire à son nepueu qu'il auoit grande efficace contre les accidens futurs.

F. Vrayment ie n'ay attendu iusques à ceste heure à en vser, i'en ay pris au commencement pour preseruatif. Toutce qu'ils m'ont fait n'a esté que de m'engendrer quantité de vents, & grande trainee de belles paroles, qui n'auoient au fonds rien de solide. Tous ces beaux diseurs n'estans que vray Charlatans.

L'eloquence ie ne deteste,

Ny ne mesprise ceux qui l'ont:

Mais ie hay plus que la peste,

Ceux qui disent mieux qu'ils ne font.

B. Ne vous estes-vous iamais ressouuenue de vous seruir des simagrees de suffisance du Cardinal de Rets, on tient qu'elles estoient bonnes à prendre en tablettes les soirs en se couchant.

F. T'en ay pris quelque iours, mais i'ay remarqué à l'vsage qu'elles n'auoyent ny force ny vertu, & n'estoient bonnes que pour transferer l'Archeuesché de Sens à Paris.

L'H. Mais à propos de cet Archeuesché, ne vous a-on iamais ordonné de prendre tous les matins à ieun de la quinte-essence del' Archeuesque de Sens, dit l'Ambigu; frere du Cardinal problematique, i'ay ony iurer à Rome sur vn bonnet de Cardinal, qu'elles estoient tres-souueraines pour guetir vn Estat malade.

F. Voire, voire, ie sçay bien là où i'en suis pour en auoir pris les annees passees, ie m'estonne que ie n'en suis morte : car ie vous puis asseurer que l'vsage en a cousté la vie à cent mil homes, sans ceux qu'elle a ruynez, & si i'en eusse vsé plus longtemps, i'estois infailliblement assommee aussi bien que Fiasque.

L'H. Pour ne point courre de hazard, i'eusse voulu prattiquer les remedes que l'on auoit ordonné à la Roynne Mere pendant sa Regence.

F. Hé, que dictes-vous, les mesmes Empyriques qui me pensent aujourd'huy, ce sont eux-mesmes qui ont aidé à perdre
ceste

ceste debonnaire Princesse, qui a tousiours eu de tres-bonnes intentions, & en fussent sortis dauantage d'vtils effectz pour le Royaume, s'ils n'eussent esté estouffez dès le commencement de sa Regence par les mauuais conseils de ces Nicolas Pseudogalenites, qui sont entendus par alliance & par interests avec de charlatans, Italiens, qui l'ont tous ensemblement trompée pour attraper ses tresors. Iamais Regnards ne deuindrent Agneaux, ilz piperront encore le Roy son fils, ie sçay le mal qu'ilz m'ont fait aussi bien qu'à ceste Royne.

B. Je me respondrois donc à prendre tous les iours vne heure deuant le repas de pillules dorees des Peres Iesuites, Madame la Marquise de Guiercheuille assure qu'elles sont tres salutaires pour purger les corps cacochimes sans vuidier la bourse, pourueu que ce soient aux personnes qui luy ressembtent.

F. C'est vne refuseuse, le Comte de la Rocheguyon sçait bien le contraire, elles m'ont vicié toutes les parties nobles, & vous diray que depuis que la Varenne m'a persuadé d'en prendre, ie n'ay peu dormir vne bonne nuitée en repos, à cause des

D

vertigots, coliques, & frenesies furieuses qu'elles m'ont donné, m'estant aduis à tous moments que l'on me porte le cousteau dans le cœur. Outre que j'ay tenu à mauuais augure d'en vser, depuis que j'ay veu qu'ilz ont emporté l'Abbaye de la Couronne à la barbe de toute la Cour, en quoy ils ont faict voir leur audace : car le seul nom de ce benefice les deuoit retenir, là où au contraire, ilz ont faict gloire d'auoir triomphé de ceste piece, laquelle ilz exposent tous les iours pour permuter avec le Prieuré de saincte Catherine de la Cousture, tout ainsi qu'ils font celle du Royaume. Ostez-moy ces gens-là ie vous prie, qui sous pretexte de me faire manger des poires de bon Chrestien, mont faict aualer tant & tant de poires d'angoisse.

L'H. Puis que tout cela vous desplaist, ie me fusse accoustumé à prédre dans mes bouillons des recepissez du Duc de Suilly.

F. Vous avez raison, ie m'en suis accommodée durant quelque temps, & m'en trouuois tres-bien, mais on me les a aussi tost deffenduës par les aduis des Nicolaites.

B. Chacun sçait que le Duc d'Espernon a eu de grands accidens de maladies, au-

riez-vous agreable que l'on vous entre-
tint des moyens dont il s'est aydé pour sa
guarison.

F. Que me seruira cela, luy & moy
sommes grandement dissemblables ; la
bonne fortune l'a conserué & ma mauuai-
se destinee me ruyne : Quand il plaira à
Dieu, & à la caballe des Peres de ce temps,
nous serons esgaux en bon-heur : Passons
outre.

L'H. La phlebotomie est quelquefois
necessaire, pourueu que elle soit faicte iu-
diciensment. N'avez-vous iamais vsé de
saignees?

F. Ouy & en grande quantité, ce qui
m'a tellement debilité que ie ne me puis
plus quasi soustenir pour auoir esté trop
reiterces, principalement celles que l'on
m'a faict sous pretexte de me garentir
du mauuais air d'heresie, ce qui m'a re-
doublé les furieux accez de ma fièvre quo-
tidiane.

L'H. Voyant que les seignes vous sont
si contraires, sçauiez-vous ce que ie ferois,
Madame, si i'estois en vostre place, ie me
resoudrois à l'vsage des sangsues.

F. Que dictes-vous ? On m'en a tant &
tât appliqué, que mon pauvre corps en est

tout perdu de leurs morsures , & ce qui est encore de plus remarquable , c'est qu'elles m'ont succé ma substance , & laissé leur venin. Or comme le sang est le siege de la vie , ie m'imagine maintenant que pour reuenir à moy , il faudroit que ie fisse vn eschange nouveau , assauoir qu'elles me restituassent ce qu'elles m'ont emporté , & moy que ie leur rendisse ce qu'elles m'ont laissé , autrement ie ne feray plus que viuoter , comme le Baron de Gondy.

B. I'ay autresfois ouy faire grand cas des tablettes cordiales du Connestable Desdiguieres , on tient qu'elles sont fort salutaires , en ayant fait veoir l'experience en l'establissement de sa fortune , vsez-en tous les iours auant que d'aller à la Messe.

F. Il y a meslé vn peu trop d'aloës parmi selon mon goust , du reste elles sont excellentes : Neantmoins les Masforets de ce temps les reiettent tout a faict. Pour moy ie trouue bonnes celles qu'il compose luy-mesme , mais si tost qu'elles ont passé par les mains de Bulion ou d'Agen , ie m'en desie , comme de tout ce qu'ils luy soufflent aux oreilles pour l'emboucheure de son Cornet.

L'H. Il y a long-temps que l'on sçait que ces gens-là débitent des mauuaies drogues: Mais que dictes-vous des Elixirs & remedes du Cardinal de Richelieu.

F. Il seroit bien capable d'en donner de bons, s'il vouloit, & principalement à ceste heure que son escarlatte l'a mis à l'abry des atteintes de l'enuie des Favorits: mais il est si accommandant à la complaisance du siecle, qu'il n'ose parler non plus que la Royné Mere. Or pour me remettre sur pied, il me faut des gens qui publient hautement mon mal, & qui n'espargnent rien de ce qu'ils iugeront necessaire pour me garentir.

L'H. Que vous semble des consultations de Monsieur le Prince, vous ont-elles esté vtilles, ie sçay bien qu'il a meslé parmy quelques dragmes de legereté: Mais maintenant qu'il a esté à Rome, chacun espere qu'il fera mentir le prouerbe. Et puis les graues discours qu'il a eu avec sa Saincteté, pourrôt auoir solidé son esprit.

F. Ie ne sçay si les drogues ont esté effuentees, ou non: mais ie suis contrainte de dire à mon tres-grand regret, que les conseils m'ont esté plus nuisibles que profitables. Au surplus sçachez qu'il n'y a iamais

eu que Henry III. en son voyage de Bretagne qui ait peu arrester le Mercure; du reste il se fut bien passé de mettre le feu dans mes entrailles, comme aussi de se porter avec tant d'animosité contre ces pauvres Huguenots, enuers lesquels il devoit employer le talent de la viuacité de ses persuasions, pour les ramener au giron de l'Eglise, & non les aigreurs de son courroux, pour les faire esgorger, quand ce n'eust esté qu'en consideration de ce qu'ils ont autrefois si vtilement seruy son pere, & maintenu sa naissance contre les calomnies des ennemis de sa maison.

L'H. Escoutez s'il vous plaist vne autre proposition. Trouueriez-vous bon d'entendre les salutaires aduis du Pere Cotton, du Pere Arnoul, du Pere Siguerant, ou du sieur iadis Pere Neron : car pour le Pere Souffrant il s'est mis à la taille pour le soulagement du pauvre peuple.

F. Non, ie les destine pour consoler tous ceux ausquels on a rayé les pensions ceste année climaterique.

B. Hé bien, Madame, il vous faut faire venir le Beat Pere Bonauenture des Recolets de Paris, qui a des admirables reuelations, quoy que fils d'un simple Boucher,

possible que par le merite de ses prieres il obtiendra de Dieu vostre guarison, & pourra faire trefue de sang entre les François en expiation du sang de tant de veaux que son pauvre pere à si souvent espandu.

F. J'ay souuentefois ouy desia parler de ce saint personnage, ie suis tres-contente de me recommander à ses bonnes prieres : mais ie ne luy veux donner la peine de me venir visiter, crainte de le destourner des frequens raiuilemés que dieu luy enuoye, & puis tous deuots Religieux sont beaucoup mieux en leurs Conuents qu'à la Cour. Laissons-le là où il est. Il sera plus propre à combattre contre l'Antechrist qu'on assure estre né, qu'à me defendre contre les attaques mortelles des deuots Castillans.

L'H. Pais que tout vous est inutile, prenez vn souuerain remede & doux à prendre, ainsi que l'ont certifié Monfigor, le Clerc, & Duret. Vsez moy del'or potable, il guerit de toutes sortes de maux. Il y a vn Ambassadeur à Rome qui seroit ladre sans cela : mais d'autant qu'il en prend tous les matins auant que d'aller en Chapelle, on assure que les boutons de son visage ne sont que grains benits qui proce-

32

dent de la ferueur de ses deuotions.

F. Je ne doute pas que ceste liqueur ne soit tres-salubre, i'en prendrois volontiers deux fois la semaine, n'estoit que ie suis trop pauvre: cela n'appartient qu'aux Financiers, puis ie n'ay point de Seaux pour la puiser.

B. Mais à propos de Seaux, vous me faites ressonuenir d'un vieillard assez gracieux, qui tenoit banque en la place Nauonne; il auoit esté fort long temps sans pouuoir marcher. On me raconta qu'à la façon de Tim nathenien qui reclamoit sa coignée à Iupiter. Cestuy-cy crioit incessammēt les Seaux, les Seaux, lesquels ayant obtenu mathoisement, on le vid aussi tost sur pied: & de fait pour marque d'un tel miracle, il a à present deux Seaux à ses costez, l'un plein d'eau beniste, de laquelle il dōne copieusement à vn chacū, & l'autre réply de plastre raffiné, avec lequel il a accoustumé de radouber les choses publiques. Vous asseurāt qu'il est maintenāt si gaillard, qu'il a bien osé entreprēdre d'aller deuant tous les Cardinaux, & sās le Cardinal de la Valette qui le menassa de passer par dessus le vêtre de son fils, de luy, & de sa bru, on croit qu'il l'eust gagné, tāt il va viste. Or est-il que ce
vieillard

lard à la renommée de faire des admirables cures, ie vous conseilerois de le mander pour prendre aduis de luy touchant vostre mal.

F. Je sçay desia de qui vous me parlez, ce n'est qu'un bailleur de billeuesées qui brusle & ard d'avarice insatiable : car tout chiragre qu'il est, il ne faict autre chose que puiser iour & nuict de l'eau avec ses Seaux. Et quand quelqu'un pense le dissuader de tant travailler, on n'a autre response de luy sinon que *facilius est refici potum quam cibo*, suivant l'Aphorisme d'Hippocrate. Hé! que ie cognois le personnage, il escoute paisiblement, respond doucement, prend hardiment, & donne du galimatias largement. Il s'est meslé de uis trente ans de me bailler de ses remedes en mes maladies, qui n'ont iamais seruy qu'à continuer mes douleurs : de maniere que ie ne puis mesme penser en luy, que ie ne puis mesme penser en luy, que ie ne rengrege mes afflictions. Helas! qu'il m'a faict de mal, il n'a point bien commencé, & le doit-on asséurer qu'il ne finira pas mieux; dès sa premiere Ambassade aux Toupinamboux pour gagner de l'argent, il s'oublia tant que de donner des passe-

ports aux ennemis de cest Estat qui vou-
loient venir en ce Royaume pour me
courre sus, durant les troubles de Henry
III. combien a-il vollé en ces pays là, au
detriment mesme de mes affaires. Com-
bien d'intelligences a-il nouées avec les
Charlatans bazanez, que son fils, & son
frere ont encore depuis renouvelles en
leurs voyages d'Ethiopie. Par leurs me-
nees mes Alliances avec Venise, Allema-
gne, Angleterre, & les Pays-bas, ont esté
ruynées, mes thresors espuisez, le Con-
seil Priué metamorphosé en vne cohue &
manque de traffiq d'Arrests, debitez par
les Proxenettes de ses parties casuelles. Il
n'y a basteleur qui face tant de tours de
souplesse avec les gobelets, que cest hō-
me avec ses Seaux.

*Ce sont Seaux des Danaïdes,
Ils ont autre fatalité
On ne les trouue iamaïs vuides,
Et font des maux infinité*

Je ne veux autre preuue pour confirmer
mon dire que le iugement qu'en fit le feu
Comte de Soissons en l'année 1612. La
Royne Mere luy persuadant de faire cas

de la prud'homie de ce bon Medecin. Ce Prince ne luy fit autre response, sinon, Madame, le bien de vostre seruice, ny celui du Roy ny du public, ne requiert pas cela. Et de faict qui repassera par dessus le cours de sa vie, il ne se remarquera qu'il ait oncques faict vne seule action genereuse, sinon pateliner, n'ayant eu autre but que de multiplier cinq cens liures de rente qu'il pouuoit auoir, en six vingt mil, sans comprendre vn million de liures qu'il a en meubles, & pareille somme en argent content qu'il met en depost par deuotion és mains de S. Matthieu, que si on me remet entre les siennes, assurement c'est faict de moy.

L'H. Je ne puis assez admirer les effets de l'ambition, en considerant vn tel homme, lequel quoy que plain de biens, & ayant le pied sur la fosse, ne s'estudie ne-aumoins ny à faire des amis, ny à se donner du repos pour luy & pour son fils. Philippe II. d'Espagne voyant sur sa vieillesse qu'il laissoit vn successeur vn peu foible desprit, se resolut pour l'establir de quitter toutes les places qu'il auoit prises sur la France, & de faire la paix avec Henry IIII. afin de lais-
 son fils paisible, &

qu'il peult passer le reste de ses iours doucement dans son Escorial ; car c'est vn coup de sagelle que de se voir finir la catastrophe de la vie dans l'honneur & dans le repos.

F. Sçachez que ce vieil Patelin est du vray naturel des singes , qui n'amendent point pour vieillir.

B. Que ferons nous donc , Madame , vous plairoit il au lieu de luy qu'on vous fist parler à vn excellent Hermaphrodite d'Estat , qui est tres-habie personnage , ainsi qu'il a dit luy mesme à Marests.

F. Quelle espece d'homme est ce , ie n'ay iamais ouy faire menrion de telle sorte de gens.

B. Madame , il faut que vous sçachiez que de tout temps on a appellé Galbouziers ceux qui prennent le nom de celles qu'ils espousent , comme Brante & Cadnet : Auioird'huy pour parler à la mode , on appelle Hermaphrodite d'Estat , ceux qui gouernent par l'organe de leurs femmes , comme faict cestuy cy qui se vante de faire merueilles : Et de faict , il y a apparence que c'est quelque grand Esculape : car il ny a que pour luy à saccouter aux oreilles du grand Cesar , presumant e-

estre des plus raffinez , à cause qu'il a 'beau-
nez. Et neantmoins les drappiers de la
Cour disent qu'il porte son esprit en es-
charpe comme son ruban . Mais tout cela
n'empesche point qu'il n'aye la vanité de
vouloir gouverner Cesar & la fortune ; De
forte , Madame , que si desirez estre secou-
ruë de ses conseils , il faut de nécessité ne-
cessitante s'adreller à sa femme , qui fera
entendre vostre volonté à son mary.

F. Je ne me veux servir de cest homme
là, non plus que des autres , ie le cognois ,
il ne faudroit pour m'acheuer de p indre
que me remettre entre les mains d'un tel
galand , qui n'est propre ny pour la plume
ny pour le poil ; & de faict deslors qu'on
sceut qu'il tenoit le gouvernail de ce grand
Nauire , i'entendis chanter ces vers aux
Pages de Mansfeld & de Halberstat.

*Desplorez la flotante barque ,
Conduite d'un esprit fallot ,
Qui presume , hypocondriaque ,
Tout gouverner , & n'est qu'un sot.*

I'aymerois mieux , comme dit le Duc de
Mentmorency , me servir de sa femme que
de luy , si tant est que le iugiez à propos.

L'H. Non Madame ; cela vous feroit inutile, attendu que vostre mal ne le peut guerir que par vn cœur masle , ainsi que l'asseurent Abemzoar, Albumazard, Auerroes, tres-doctes Medecins Arabes, & le Gaulois Herouart.

F. Mais pourquoy n'approuuez vous que ie me serue d'elle ! puis que chacun scait quelle est puissante en remedes, ayant depuis peu de iours remis sur pied plusieurs personnes abandonnees des Medecins, & guery vn vau rien d'une epilepsie tres-dangereuse, qui est vn vray miracle, à raison que tous les Medecins ont tousiours tenu les cheutes du haut mal incurables.

B. Il est vray, Madame: mais vous scauez que le Ciel ayde aux innocens, aux fols, & aux ynrongnes ; & le monde aux macquereaux, aux bouffons, & aux traistres, qu'ainsi ne soit telles gens ne tombent iamais que debout dans vn siecle malin. Et puis il estoit aysé à ceste femme de guerir vn Charlatan qui luy a prouué par huit mille pertinentes raisons valans vne pistole la piece, que tant s'en faut qu'il fust malade, que au contraire on le trouuerroit tousiours à l'examen aussi sain

qu'un ladre. Or est-il que vous n'estes pas en tel termes. Que si vous avez enuie de veoir ceste Fée aux beaux pieds, pour deuifer avec elle, au nom de Dieu soit, vous passerez autant de temps à l'ouyr caqueter; la gaillardise seruant grandement à la guerison des malades. Pour moy ie ne l'ay iamais veüe qu'une fois, comme elle se promenoit dans des Preaux, soustenuë par deux Caualliers portans pannaches, dont son mary estoit l'un. Elle auoit force Courtisans à sa suite, vous excusez bien, Madame, si pour vous diuertir ie vous dis icy vn mot pour rire : c'est qu'en si peu de temps que ie m'amufay à la contempler, j'entendis vn de ses suiuanans qui gringottoit entre les dents ce petit couplet.

*Ceste pisseuse si gentille,
Qui se fait mener sous les bras,
Si elle estoit entre deux draps,
Elle en laisseroit plus de mille.*

Au surplus c'est la plus propre femme de tout l'empire de Trebizonde, elle n'espargne rien pour se faire paroistre. Je scay de science qu'en quatre mois elle a despensé cinq cens escus en souliers seulement,

en l'année mil six cens dix-neuf.

*Dame à qui souuent est hauffee,
La chemise & le corillon :
Pour animer son postillon,
Doit estre tousiours bien chauffee.*

Si ceste belle Dame pouuoit aussi bien chauffer les esperons aux Marannes , ce seroit vne braue Amazone : Car toutes les apoplexies qui vous sont suruenues , les cathetres , rhumes , & autres defluxions , ne vous prouiennent que des vents coullits que vous enuoye la beante Castille , qui n'a autre soucy que de vous faire taster charitablement le poux à tous moments , pour sçauoir combien vous pouuez encore durer au monde , N'avez vous iamais assemblé vos Medecins pour obuier à toutes ces incommoditez.

F. Helas qu'il m'a cousté en consultations inutiles , i'ay assemblé mille & mille fois mes Medecins sur ce subiect , ie ne sçay si c'est par pure ignorance , ou par la scheté de courage , ou malice premeditee , ou par vne denegation d'amour enuers leur patrie : mais ils ne m'ont donné encore aucun soulagement , ma croyance estant qu'ils

qu'ils ne pensent qu'à leurs affaires, & non à chercher les moyens de me guarir. Et de faict vn iour les ayant faict assembler à cause d'une appoplexie qui m'estoit suruenue, ie les fis espier par le trou de la serrure, pour voir ce qu'il faisoient, on me rapporta qu'ils s'amusoient à attifer vne des belles Dames de ce temps nommee Griuelee, autour de laquelle ils bubailloient tous comme vieux Mulets. Quelque temps apres sortant du Conseil, on eust dict qu'ils auoient la cervelle tout vsee à force d'auoir eslambiqué leurs esprits à tamiser les affaires publiques, & puis reposez vous sur tels chalans.

L'H. Ie ne m'estonne donc plus, deplorable Princeesse, si tout va de trauers, & si les Demons bazannez vous ont tant infecté le corps par leurs haleines puantes; ie ne m'estonne non plus si la bonnasse n'a peu estre de longue duree en l'Oceean de nos affaires, ou les vens impetueux de la caballe estrangere excitent tant d'orages parmi les escuens de nos infidellitez, & si la Nef Françoise n'arriue à bon port, puis que ceux entre les mains desquels on met le gouuernail, s'amusent à Pirater, au lieu de considerer dans la carte le rhum des vents;

& la route qu'il faut tenir pour surgir heureusement en vne Haute assuree.

F. Si mes Pilotes ne faisoient profession, comme vous voyez, de viure dans la confusion, a fin de faire perdre la piste de leurs volleries, ie me donneroie quelque esperance de respirer : mais ils ont pris vne telle accoustumance qu'ils ne font maintenant gloire ouuerte, ne voulans permettre en façon quelconque qu'il soit faict recherche de ceux qui ont fait mal, ny establir vn ordre qui les puisse obliger à faire mieux. Voila pourquoy mes amis ie vous confesse que tant plus i'aprofondis ce grand cahos de desordre & de malice, & plus i'y trouue les marques euidentcs de ma ruyne entiere.

B. Si ne faut il desesperer, Madame Dieu fait ses miracles lors que nous y pensons le moins. Il me souuient auoir veu il y à quelque temps, certaines gens qui estoient dans l'eau iusques au col, au beau milieu de plusieurs grandes riuieres qui s'assembloient toutes en vne chacun les tenoit pour perdus, d'autant que l'on entendoit leurs voix plaintiues crians incessamment point de fonds ? point de fonds; il n'y a point de fonds : la commiseration

me faisoit apprehender que l'eau les suffo-
cast, Ce pendant quelque temps apres ie
fus tout esmerueillé que ie rencontray ces
hommes là bien suivis , qui auoient des
grands offices, belles maisons aux champs
& en la ville, leurs enfans richement &
noblement alliez , encores qu'ils fussent
de race de laquais & de porteurs de roga-
tens. Voila pourquoy, Madame il me sem-
ble que deuez tousiours bien esperer, &
vous resoudre à la volonté de Dieu.

F. Mes amis, vous sçauiez que ie ne tiens
rien du naturel de ces fins saints Catholi-
ques Marannes de ce temps, qui n'ont re-
cours à Dieu que par fiction, pour moy
comme tres-Chrestienne que ie suis, ie
n'ay autre espoir qu'en la bonté diuine ,
prenant en bonne part toutes les affli-
ctions que le Ciel m'enuoye , mais il faut
que ie confesse que ie porte tres impati-
emment les pieux tours de peigne que ie
reçois tous les iours de de-la les Monts. Et
encore ce qui m'angoisse le plus, c'est l'in-
fidelité des miens, lesquels au lieu de mas-
sister pour me garantir de leurs pieges ,
me trahissent & vendent a beaux deniers
contens entre les mains de mes cauteleux
voisins, ce qui me faict creuer de rage de

me veoit si mal seruire par telle maraudaille; que si ie ne craignois d'offenser Dieu ie prierois volontiers le Duc d'Vzez de leur donner tant de coups d'espée qu'ils en demeurassent estropiez tout le cours de leur vie, pour marque de leur felonnie.

L'H. Madame la gloire des Grands est de faire les chastimens par les formes ordinaires de la iustice : mon aduis seroit que les entendissiez en leurs iustifications, comme le Roy a entendu celles de Putange & de la Vernet, ne pouuant aduoüer le proceder que l'on a tenu contre Schomberg, d'autant que s'il auoit manqué aux devoirs de sa charge, il le falloit punir, & non le laisser aller, pour mettre vn autre en sa place qui fera de mesme.

*Quand on debusque vn officier,
Et qu'on ne recherche sa vie :
C'est signe qu'un ennemy fier,
La voulu chasser par enuie :*

Si on eust chastié ceux qui auoient mal conseillé la Royne Mere durant sa Regence, Luynes n'eust pas trouué tant de Ministres de son ambition au detrimement des affaires du Roy. Pour moy ie persiste,

Madame, que fassiez venir tous vos Medecins Mercurialistes, Pseudogalenites, & Empyriques, Berneuelistes, qui estoient n'agueres alentour de vostre liect à nostre arriuee, ie croy qu'ils sont encores icy ou dans vostre cabinet.

F. Ils n'y sont plus si tost qu'ils ont ouy parler de mes affaires i'ay remarqué qu'ils ont tous esquiué en tapinois, & ne croy pas qu'ils m'approchent tant qu'ils vous sentiroient pres de moy crainte que ne les grattiez où ils ne leur demangent point, comme le feu Comte de Soissons en auoit bonne enuie.

L'H. Si ne les faut il pas condamner en leurs absence. Trouueriez vous bon Madame, qu'on les fit proclamer à comparoistre presentement pardeuant vous.

F. Tres-bon, l'Hospital: car ce me sera vn grand contentement de les baffouët sur leurs impertinentes excuses. Cela seul sera capable de me guerir, que Bayard leur face entendre ma volonté tout maintenant.

B. On faict assauoir que tous ceux qui ont manié les affaires du Royaume depuis la mort de Henry le grand, qu'ils ayent a venir rendre compte de leurs actions de-

uant le Tribunal de la France, seant en son liët de Iustice.

L'H. Personne ne vient, Bayard. Commandez encote vne fois, afin de vous faire entendre, possible que Monfigot comparoistra pour brauer ses ennemis, ou le Filou au nom des Financiers.

B. Vous tous par le conseil desquels la France a esté gouuernee depuis l'accident lamentable du coup de Rauaillac, vous estes adiournez à comparoistre personnellement à l'heure presente pour vous iustifier deuant la France & son Chancelier de l'Hospital, de tous vos deportemens, à peine d'estre conuaincus de crime de leze Maiesté, & d'estre declarez les vrais perturbateurs du repos public.

F. C'est en vain que tu t'efforces de crier, Bayard, personne d'entre eux n'aura la hardiesse de se venir iustifier, ils sçauent trop en leurs ames les maux qu'ils m'ont fait. Le President Jeannin s'estoit mis en deuoir de venir, mais i'ay apperceu qu'ils l'ont empesché d'acheuer son voyage, crainte qu'il ne declarast tous les secrets de l'eschole. Par là mes bons amis, vous voyez comme i'ay esté miserablement trahie, maintenant ie vous cōiure par la pru-

d'homie & fidelité de laquelle vous auez tousiours faict profession, de me vouloir assister en ceste extremité où vous me voyez reduicte. Mais auant que de me donner vos conseils salutaires là dessus, ie croy qu'il est à propos que ie vous raconte vn songe que i'ay faict cette nuit.

Il me sembloit que ie voyois Cesar assis en son throsne, enuironné d'un nombre infiny d'animaux de toutes sortes; puis arriua vn vieillard affublé d'un chappeau de cassade, porté dans vne chaize, n'ayant n'y pieds pour aller au bien, n'y bras pour deffendre, sinon force mains deuant & derriere pour gripper à toutes occasions; A son costé droict estoit vn homme ennazé à poil follet, qu'aucuns appelloient Marotin; Au costé gauche estoit vne ieune courtisanne ayant les deux mains ouuer-tes, qui d'abord donna ce croq en iambe à vn Allemand, auquel elle arracha les bourses sans toucher à ses testicules; puis tous trois ensemblement se couvrirent aussi-tost du voile d'une grande Dame, de l'ombre de laquelle ils se seruoient, sans vouloir neantmoins permettre qu'elle consulta avec Cesar, & lors qu'elle pensoit s'en approcher, ce vieillard usant de

magie mettoit incontinent vne barre en-
 tre l'Empereur & elle ? & au mesme instant
 Marotin couroit à l'oreille de Cesar pour
 luy imprimer en l'esprit des terreurs pani-
 ques, s'efforçant de persuader au Prince
 combien il estoit perilleux que ceste Prin-
 cesse s'approchast de luy pour plusieurs
 raisons qu'il alleguoit, lesquelles quoy
 que tres-noires, il faisoit neantmoins pa-
 roistre blanche au moyen du plastre qu'il
 mettoit dessus. Ce qui donnoit suiet de
 murmurer à ceux qui consideroient telles
 astucieuses procedures : mais cest esprit
 follet mettoit aussi tost son grand nez en-
 tre leurs bouches & l'oreille de Cesar, di-
 sant que leurs interets particuliers les fai-
 soit ainsi parler, & que pour son regard il
 n'en auoit aucun, sinon celuy de la future
 grandeur de la femme,

Apres toutes ces choses ce vieillard fit
 passer la pluspart des animaux deuant luy,
 Le premier fut vn oiseau rouge, ayant vne
 croix sur l'vne de ses aisles qu'il rebuta, à
 raison qu'il disoit auoir le vol trop lourd.
 Il reietta aussi vn autre pareil oiseau, par
 soupçon qu'il voloit trop haut. Vn loup
 gris vint à passer qu'il chassa, parce qu'il
 estoit mordant comme vn Maugeon. En
 suite

suitte ie vis vn vieil ours descendant des montagnes, chargé d'une croix, bien qu'il ne l'aime qu'en quarts d'escus. Et d'autant qu'il n'entendoit ny parloit, on luy donna vn petit bœuf gras pour le mener par le nez. le veis encore passer vn vieil Taureau escorné, reuestu en gendarme, avec le bord du chapeau retroussé, chacun le louoit d'auoir iceu bien conduire ses affaires, & encores mieux celles de son feu Maistre; Et neantmoins ce vieillard le repoussa, pour introduire vn ieune Elephant né dās vne vieille ville de Trace, auquel mesme il ne se fioit pas beaucoup.

Vn autre genre d'animaux passa encores deuant luy estrangement vestus, ayans les ailles rouges, & les testes couuertes de gros boisseaux, allans à pas de plomb. Ce vieillard ietta ses yeux sur le premier, auquel il fit quelque proposition sur le debit de ses denrées, à quoy il n'eust pas vne responce, *Recto ore.*

Il ne dit mot au second, à raison qu'il estoit trop entier, & non assez corrompu pour la Cour.

Le troisieme, il ne le regarda pas, d'autant que *habet pectus in ore.*

Le quatriesme il l'eust volontiers arre-

50
sté près de Cesar, à cause de l'affinité, & neanmoins il le laissa passer comme les autres, parce qu'il le desffoit de le pouuoir accoustumer comme luy à la corruption du siecle.

Après ceste momerie arrina à l'improuiste vn pellerin qui d'abord carassa le vieillard, puis le culbuta avec toute sa sequel-le, soufflant des ruynes de toutes parts, afin de ietter Cesar dans les perils, sous ombre de quelques predctions Astrologiques qu'il auoit en sa pochette, se presumant tout luy estre permis, voire mesme de pratiquer sans peché en ce pays les vz & coustumes des climats plus chauds: & me sembloit encore que de tous ces fanto mes il en vouloit faire vn beau pot pourry pour me resiouir le cœur.

L'H. Madame, Bien que ie ne sois de ceux qui s'arrestent aux songes, ie vous diray neantmoins que cette vision ne m'ag-gree nullement, d'autant qu'elle a quelque verisimilitude avec les affaires courâtes du temps, qui est le plus mauuais augure que i'y remarque. Et pour ce qui regarde les moyens d'en destourner les effects, ils sont si difficiles, tant à cause du malin-ueteré, qu'à raison de la malice des esprits

Si
corrompus, que nous faisons mesme doute en ayant trouué les remedes, de pou-
voir par apres rencontrer des personnes
pour les mettre fidelement en execution,
estant tres-certain qu'il y a beaucoup plus
de Clercs que de Beaucleics, qui par leurs
astuces renuerſeront en vne heure tout ce
que nous aurons fait en vn an pour la con-
seruation de vostre santé, & par ce moyen
rendront tous nos labeurs inutiles.

F. Sera il dit donc qu'ils faille que ie
meure faute de bons appareils, & que ie
ſerue de curee à des Medecins Emphyri-
ques, qui deuorent toute ma substance
par leur ambition & auarice insatiable.
Secourez moy, Sire, puis que ie vous ay
nourry, & que vous portez le nom de
Iuste: Ne manquez à vous mesme, deſtour-
nez ceste malheureuse destinee de dessus
moy, puis que ie ne vi que pour vous, &
que vous perdez tout en me laissant per-
dre, faute de chastier ceux qui m'ont re-
duit sur la paille, & de boucher les aureil-
les aux esprits infectez de la manigance
estrangere, qui ne batte tous les iours qu'à
vous deceuoir.

L'H. Madame, vous deuez esperer
toute assistance du Roy, il est tout benin,

tout bon, & tout vertueux, plain de Iu-
 stice, plain de generosité, & plain d'a-
 mour enuers les siens; laborieux, patient,
 & secret; non addonné aux vices, croyant
 conseil, & nullement opiniastre; inuinci-
 ble contre le mal, & se laissant vaincre à
 la raison. De maniere qu'il ne luy reste
 qu'à tomber entre les mains des fidelles
 seruiteurs & loyaux Conseillers. Car si se
 passe quelque chose d'iniuste; c'est à son
 desceu: si au preiudice de son Estat, c'est
 contre son sentiment: si à la foudre de son
 peuple, c'est contre son gé: & si on glisse
 des diuisions entre luy & la Roynes la Me-
 re, c'est contre ses desirs. Bref il n'y a rien
 à souhaiter en sa personne, sinon qu'il
 plaie à Dieu benir sa vie de longues an-
 nees, & luy donner vn bon Conseil, d'au-
 tant que de ce seul deffaut, ont pris nais-
 sance toutes les calamitez qu'auiez souf-
 fertes, pour auoir laissé approcher près de
 vostre sacree personne certains pourceaux
 d'Espicure, qui ont mieux aymé croupir
 dans la felle acquisition de leurs richesses,
 & dans le desordre: que de travailler
 pour acquerir la gloire de bien faire: Vos
 Confesseurs mesmes conuiuans avec eux
 & à l'esbranlement de ceste Monarchie.

*Tant que l'on verra dans le Louvre,
 Un Iesuite pour Confesseur :
 L'Estat ne sera iamis seur,
 Le temps passé nous le descouure.*

Depuis que les importunitéz de ceste Societé a eu le pied , toutes sortes de caballes y ont pris racine , & tous nos maux leur origine.

F. Ha ! l'Hospital, l'Hospital ! Que les gens de bien font de bien , & que les gens de biens font de mal. Tout ce que vous dictes est vray , ie lçay que mes mauuais Medecins m'ont miserablement alitee, & que ie ne doibs esperer ma guerison que du Roy Ce que ie vous requiers maintenant , c'est de me donner chacun en vostre particulier les remedes que vous iugez necessaires , tant pour ma santé, que pour ma conseruation. Si mon mal est incurable, au nom de Dieu soit : ie prendray patience, comme la Royne Mere: Mais pour le moins ce me fera vne consolation de faire entendre mes plaintes au Roy , & de le supplier de me donner main-forte pour faire executer vos bons Conseils.

L'H. Madame , quand ie repasse mon

esprit sur tout ce qui vous est arrivé, cela me faict resouuenir de ce pauvre malade d'Escoce, auquel la fièvre augmentant tous les iours, ses flatteurs Medecins neantmoins l'asseuroient que toutes les crises, quoy que mortelles, estoient autant de signes certains de la prompte guerison, & continuerent à l'entretenir de ceste façon, iusques à ce que la mort l'eust reduit au cercueil. De mesme, deplorab'e Princesse, auez vous esté médicamentee aux diuers accidēs qui vous sont suruenus, auxquels il estoit facile de remedier, si ces Empiriques ne vous eussent tousiours persuadé que vous estiez en parfaicte santé, mesme au milieu de vos plus grands accrez de fièvre, ayant ainsi laissé croistre vostre maladie, iusques à vn tel poinct qu'ils vous ont en fin reduit aux derniers abbois. Pour à quoy remedier mon opinion seroit, Que tous les Officiers de la Couronne & les Parlemens vous donnassent le plus promptement & succinctement que faire se pourroit, leurs aduis par escrit sur l'estat de vostre indisposition, afin d'obliger par là le general, à repousser vn mal qui regarde le general. Et d'autant que le secret est l'ame des Conseils, vous deuez

choisir quelque petit nombre de vos plus confidens , tant pour examiner leſdits aduis , que pour en compoſer vn Elixir pour appliquer aux douleurs plus preſſentes. Quand à mes ſentimens particuliers, ils ſeroient de commencer par l'honneur de Dieu & de ſon Eglife, ſi le temps y eſtoit propre; puis par l'eſtabliſſement de la Malice: d'autant qu'il eſt impoſſible de reprimer la violence du vice que par la force, & par ceſte voye faire reluire avec police la terreur de vos armes ſur la frontiere, & voſtre Juſtice par tout le Royaume. Tenir pour reigle inuiolable de n'admettre près de vous que des gens eſtimez dans le public, pour leur probité & experience. Ne vous ſeruit iamais d'un homme que l'on ſçait eſtre porté à executer indifferemment auſſi toſt le mal que le bien.

Eſloigner de vos conſeils tous ceux que l'on cognoiſt, voire que l'on ſoupçonne pour Emiſſaire de la faction eſtrangere. Regler vos financiers, rechercher ceux qui ont volé voſtre Domaine, & les deniers de la Coutonne. Reietter d'oreſnavant tous ces moyens extraordinaires que l'on inuente pour en recouvrer, qui ſont tous à la foule du Roy, de l'Eſtat & du peuple;

estant plus qu'e iuste que vous retiriez ce
 que ce que l'on vous a pillé, de ceux qui se
 sont enrichis dans le maniemēt de vos
 affaires, que d'introduire l'allienation
 des tailles, qui est vn prompt moyen pour
 achener de ruynet le Roy, & le pauvre
 peuple, qui a de la peine mesme à respi-
 rer. Apres cela purgez accortement vos
 entrailles des humeurs atrabiles d'Iberie.
 Ne permettez plus que l'independance
 de vostre Couronne tombe en question
 problematique. Obuiez aux factions des
 Grands fuyez comme la mort les guerres
 ciuiles. N'y rentrez legerement soubs l'au-
 guste pretexte de Religion, qui a tousiours
 serui de specieuse enuelope pour couvrir
 la malice des ennemis de l'Estat. Iettez les
 fondemens d'une ferme paix, & pour y
 paruenir trauallez à ce que le Roy & la
 Royne sa mere se conseruent en vne par-
 faicte intelligēce : car par ceste vnion
 vous acquerrez vn perdurable repos ; &
 coupez la gorge à toutes les factions qui
 se pourroient faire pour vous troubler.
 Ostez la vanité des Gouuernemens, cou-
 pez la broche aux-extrauagances de chi-
 quaneries, bannissez le luxe des habits, &
 l'excez des festins, les deux vrayes pestes
 d'un

d'un Estat & de la vertu. Ne souffrez la Surintendance de vos Finances, Secretariat de vos commandemens estre conjoincts aux deux charges de Tresoriers de vostre Espagne. Ordonnez quelques garnisons plus releuées que les autres, pour l'instruction de la Noblesse aux fonctions militaires, N'engagez le Roy en des petits voyages legers, pour pratiquer des menées. Establiſſez des recompenses aux bōs & des gibets aux meschans. Parmy tant de desordre que l'on a veu. où est encore le premier Officier, Conseiller d'Estat, Ambassadeur, Capitaine, ou financier, qui ait esté chastié pour auoir mal seruy le Roy ? Tenez ceste Maxime pour Oracle, Madame, que vous ne regarirez iamais, que vous ne fassiez escraſer sur vos playes les mesmes Scorpions qui vous ont blessé. Quand vous aurez mis cela en pratique, vous guarirez bien-tost, d'autant que chacun ouurira les yeux pour bien faire, crainte de vous manquer.

F. Vos Conseils procedent d'un homme de bien : mais d'autant qu'il ne s'en trouue pas beaucoup de ceste liurée, i'ay grand peur, l'Hospital, de ressembler à ce Paralytique qui demoura à guerir faute de

rencontrer vn homme qui le peust ietter dans la piscine; si ce n'est que Dieu m'en suscite quelqu'un par miracle: car nous sommes au temps qu'il s'en faiet en abondance. Qu'en dictes vous Bayard?

B. Madame, encore que ie vous voye parmy les douleurs, & considerant d'où ils procedent, il me prend enuie de vous raconter vne plaisanterie qui arriua entre vn Sénateur Venitien, & vn Gentil-homme François, qui se rencontrerent fortuitement dans vne mesme Gondole, donc on a accoustumé d'vser pour se recreer sur les canaux de Venise. Ce François qui estoit turbulent ne faisoit que changer de place, & pensa plusieurs fois faire renuerser la Gondolle. Apres qu'ils eurent mis pied à terre, ce Patricien s'enquist tout froidement du seruiteur du François, de quelle nation & qualité estoit son maistre. Ce valet pour le louer, respondit qu'il estoit Gentil-homme François, & de plus Conseiller du Roy en l'un de ses Parlemens. Ces paroles estonnerent tellement ce Sénateur, qu'il se prit au mesme instant à crier. *O pauerina Francia, consigliata da matti.* Ainsi, Madame, si i'osois, ie dirois volontiers comme ce bon Venitien.

Au surplus philosophant sur le cours de vostre maladie, ie ne sçay si ie me dois rire de vos Medecins, ou pleurer vostre mauuaise fortune. Quoy que s'en soit, vous auez eutendu les bons Conseils que vons a donné vostre Chancelier de l'Hospital, touchant vos infirmittez internes, il n'y a rien à adiouster apres luy; pourueu que le Roy les remette en execution, assurement vous pourrez encores viuoter: Mais pour vous guerir tout à faißt, & vous garentir des orages qui vous menassent, mon deuoir m'oblige à vous supplier de me vouloir ouïr touchant les externes, qui ne sont moins importantes que celles du dedans. Vous sçauiez que pendant que vous estiez deuant Montauban, l'Espagnol a pris l'occasion de s'emparer du Duché de Iuliers, du haut & bas Palatinat, qu'il a fort accortement ioint à ses pays-bas. Il a desmelé à son aduantage toutes les broüilleries de Boheme & de Hongrie, il a faißt bouquer tous les Potentats de la Germanie, il a befflé l'Angleterre, il s'est emparé de la Valtoline, puis des trois Ligues Grises, depossédé le Marquis de Tour-lac de ses pays. De sorte que si on laisse affermir ses conquestes, il est tres certain

qu'il se rend maistre de toute l'Italie, & dominateur des Allemagnes, & par ce moyen il encloist ceste Couronne de toutes parts par des puissances si grandes, qu'il sera impossible qu'elle puisse resister. il ne faut pas peser la prise de la Valtoline, à cause du passage que l'Espagnol nous bouche pour aller en Italie, pleust à Dieu que nous n'y allions jamais, mais il faut exagerer l'importance de ceste perte pour deux poincts considerables. Le premier, que l'inuasion de ce pays-là attire quant & soy la conqueste de l'Italie, qui est vn grand redoublement de force à la maison d'Autriche. Le second, c'est tout ainsi que l'vsurpation de la Valtoline a donné le ioug aux Grisons, la perte des Grisons attire avec soy la ruyne entiere de toutes les Lignes de Suisse, & ouvre le chemin à l'Espagnol pour paruenir au dessein qu'il a de la Monarchie de l'Europe. Car ce qui l'a empesché d'y arriuer, c'est qu'il a toujours esté en necessité d'hommes. Or par le moyen des Suisses il ne manquera plus de gens; d'autant qu'il en aura tant qu'il voudra pour faire de grosses armées, avec lesquelles il attaquera ce Royaume ouuertement de tous costez, outre les res-

torts qu'il aura dedans par l'aide de ses
 supposts, & establisement de tant de nou-
 ueutez qu'il a faict glisser parmy nous
 depuis vue vingtaine d'annees. Pour re-
 medier à tout ce que dessus, il ne faut pas
 enuoyer le Marechal de Bassompierre, ny
 le Duc de Bellegarde en Espagne, ce n'est
 que despense inutile, & perte de temps:
 car si cest affaire se manie par negotiation,
 elle tombera infailliblement en perdi-
 tion. Je ne suis point d'aduis non plus, de
 faire la guerre ouuerte ny à l'Espagne, ny
 à la maison d'Austriche. Mais vous deuez,
 Madame, assister à bon escient vos Alliez,
 les faire mouuoir tant en Allemagne qu'I-
 talie, enuoyer vers eux toute la Noblesse
 & les soldats qui cherchent les armes, ne
 plus permettre qu'ils aillent seruir les Ibe-
 riens donner de bonnes instructions à vos
 Ambassadeurs, & les chastier rigoureuse-
 ment si ils ne les executent mieux que par
 le passé, releuer la reputation de ceste
 Couronne qui descheoit tous les iours
 parmy les nations estrangeres, & reculer
 de vos Conseils tous ceux qui ont l'halei-
 ne Espagnole. Ce faisant nous vous reuer-
 rons bien tost sur pied, aussi gaillarde que

iamais, & tous vos bons subjects resiouïs du recouurement de vostre santé.

F. Sire, vous avez peu entendre comme moy les salutaires Conseils d'un Chancelier preud'homme, & d'un Cheualier sans reproche. Donnez vostre oreille maintenant aux plaintes douloureuses de vostre pauvre France; prestez luy la main pour la secourir, deffendez-la de ses ennemis ouuerts & simulez. Que si ne voulez que ie les vainque, ne permettez au moins que ie sois vaincuë : car asseurement ils me mettront le pied sur la gorge, si vous les laissez d'auantage entreprendre dedans & dehors, il ne faut rien craindre, la puissance d'Espagne n'est redoutable qu'à ceux qui n'ont point de courage, il ne faut pour exemple que le hardy passage de Mansfeld dans le Brabant, & ce petit Estat de Holande, qui par sa genereuse conduite culbute & par mer & par terre ceste orgueilleuse grandeur de Castille. Sire, reprenez les erres du Roy vostre pere, heurtez ces fanfarons qui me muguent nuit & iour, empeschez d'estre deformais preueni par les ministres de leur Caballe. Si vous le faictes, vous viurez

glorieux, & chanterez vos louanges; Sinon
je diray avec Nostradamus le ieune.

*L'Almanach n'a pas renaissé,
Quand il a dict que ceste Année,
La France seroit gouvernee,
Aussi mal que par la passé.*

